



Шочмо эл, порылык да чын верч!

Б У Д Ъ Г О Т О В /

11-ше (3711) №,
2025 ий 21 март,
кугарня



0+

Имде лий

1933 ий 1 февраль годсек лектеш.



Ростислав Васинкин (Марий Турек, Арбор тўвыра пöрт).

Шокто, шокто гармонетым...

Гармоньчо лияш кажнылан пұралтын огыл. Мастарлык деч посна айдемын эше юзо вийже лийшаш. Тунам гына чоным тарватыше яндар да волгыдо сем шочеш. А самырык гар-

моньчо-влакым калыкын поян-лыкшылан шотлыман. Лач нине чолга шұдыр-шамыч 15 мартыште «Изи гармоньчо» регион-влак кокласе конкурсышто шке мастарлыкштым ончык-

теныт. Тагасымашым Марий тўвыра рўдер Йошкар-Олаште эртарен.

И.РЕЧКИНЫН фотожо.

Умбакеже – 2-шо лаштыкыште.



Йошкар-Оласе
Бауман лицейыште
«РЫЖИЙ КОТ» школ
театр йоча-влакым
иквереш чумыра.

3-шо лаштык



«Авай, ўмырет мучко
мый денем кугешнаш
тўналат», – серен
Артём Семёнов.



4-ше лаштык



Газет дене кылым
кучышо ўдыр-рвезе-
влак «юнкорын
кресачажлан» кōм
шотленым?

5-ше лаштык

Российысе увер

Россий почто «Лучший урок письма-2025 конкурсым увертарен. Тушто икмыняр номинаций темлалтеш. Паша-влакым 15 август марте konkurs@russianpost.ru адрес дене электрон почтыш колтыман. Кумданрак pochta.ru сайтыште лудса.

«Страна – Театр – Школа» всероссийский фестиваль эртаралтеш. Кажне регион гыч 2 йоча театр коллективым ойырат. Нуно постановкыштым Москваште ончыклат. Марий Элыште фестивальын очный туржо 1-10 апрельыште лиеш.

«Книжный штурман» конкурсыш ушно да йоратыме книгат дене палдаре. Тудын нерген рецензийым возо але видеом да комиксым ыште. Йоратыдыме книгаланат полклен кертат. Кумданракын – lermontovka-spb.ru сайтыште.

Марий Элысе увер

«Ший талешке» шымлыме паша республикысе конференций 22 апрельыште эртаралтеш. Тудо Марий талешке кечылан полкклалтеш. Йодмашым да возымо паша-влакым 14 апрель марте mari-centr_konkurs@mail.ru адрес дене электрон почтыш колтыман.

2-5 апрельыште Школысо президент-влакын всероссийский форумышт Москошто эртаралтеш. Тушко Звенигово лицей гыч Вероника Столярова ден 2-шо номеран Медведево школ гыч Софья Васильева ушат. Нуно, конкурсым эртен, сенгыше-влак коклашке лектыныт.

«Мыйын еш архивем – 2025» республикысе конкурсыш еш дене ушныза. Тудо Кугу Ачамланде сарыште Сенгымашлан 80 ий теммылан полкклалтеш. Танасымаш районлаште да олаште 12 апрель марте эртаралтеш. Финал Йошкар-Олаште 26 апрельыште лиеш.



Тўналтышыже – 1-ше лаштыкыште.

Тушко Марий Эл, Татарстан да Башкортостан республикла гыч 9-17 ияш 23 самырык гармоньчо да вич еш ансамбль ушненыт. Участник-влакын калык ончылно шкем кучен моштымаштым, семым келыштарен йонгалтарымыштым жюри аклен. Тўрлў кундемын семже, кумдан палыме муро-влак шонаш таратеныт але тавалтен колташ кумыланненыт. Самырык гармоньчо-шамыч шукушты шке гыч семўзгарым шокташ тунемыныт. Южыжым ачажын але кокажын мастарлыкше таратен.

«А ўдыр гармоньчо-влак ли-йыныт мо?» – тыгай йодыш шочеш, очыни, лудшо егын. Лийын! Звенигово район Кожласола сымыктыш школын тунемшыже, «Ончыкылык ўшан» ансамблын участницыже Дарья Дитарова (снимкыште) шинчалан вигак пернен. Тудо кугезе кокажын пашажым умбакыже шуя. А гармоньжо могай! Вигак шижалтеш: ўдыр тудым йората да шкаланже келшышын сўрастарен.

Конкурсын сенгышыже-влак дене гала-концертыште палдареныт. Тудо В.Ленин лўмеш тўвыра полатыште эртаралтын. Гармоньчо солист-влак коклаште Гран-при дене Ростислав Васинкин (Марий Турек, Арбор тўвыра пўрт) палемдалтын. Тудлан у гармоньым кучыктеныт. Ансамбль-шамыч коклаште Яранцевмыт ешын семўзгар ансамблыже (Волжский, Памар тўвыра пўрт) Гран-прим сенген налын. Нуным снимкыште ужыда. Ешлан акустический колонкым полккланыт. Нине уста ўдыр-рвезе-влак кумылдам савыреныт гын, теат мурсем тўняшке ушныза. Келшыше семўзгар полшымо дене шўм-чонда гыч шолын лекше сылне сем дене тўням куандарыза!

Е.СЕРГЕЕВА.
Авторын фотожо.

«Зарница» – онгай модыш

Токтарсола школыштына Шочмо элым аралышын идалыкшылан полкклалтше шуко мероприятий эртаралтеш. Иктыже – «Зарница» модыш. Кум тўс дене ойыртемайтше команде-влак урок деч вара школ ончылно погынышна. Капитан-шамычын рапортым пуымекушты, школ вуйлатыше маршрутан кагазым кучыктыш.

Чылаже шым этапым эртыман. Мый «канде» командын капитанже улам. Мемнан рвезе-ўдыр-влак чулымлык, писе уш-акыл дене ойыртемайтчы да сенгышыш лекна. Модыш деч вара школ кочмыверыште шокшо шудо чай ден тамле сий мемнан вученыт.

Родион НЕБОГАТИКОВ.
У Торъял район.

Тул тўсан пырыс – школ театрын тамгаже

20 мартыште тўнямбалне Йоча театр кече палемдалтын. Марий кундемнан рўдолаштыже вич театр уло. Йоча-влак Республикысе курчак театр ден Марий самырык театрыш кошташ поснак йоратат. Тушто нунылан келыштарыме спектакльым чўчкыдынрак ончыктат. Икшыве-шамыч шкеныштым актёр семын сценыште терген ончынешт гын, тидланже республикысе ятыр школ але тўвыра пёрт пелен кружок, ушем-влак пашам ыштат.

Теве Йошкар-Оласе Бауман лицей «РЫЖИЙ КОТ» школ театрже (снимкыште) дене чаплана. Тудо 2022 ий гыч пашам ышта, да 26 талантан икшывым шке йырже чумыра. Репертуарыштышт кум спектакль уло: «Баранкин, будь человеком», «Невозможное – возможно», «Два клёна».

– Школ пеленысе театр почылтмеке, икымше кече гычак тушко ушненим. Икмыняр постановкышто модам. Тўн ролят логалеш. Теве «Баранкин, будь человеком» спектакльыште Баранкинын рольжым ўшаненит (снимкыште). Мыланем сценыште модаш моткоч келша. Адакшыым актёр семын виянем



й ы л ы м
лы выр таш
полиша, вес
ея дене кылым
ышташ туныкта, –
ойла театрын ик чол-
га участникше Иван Софронов.

– Лицейым шке коклаштына «Доброград» икешотан ола манын лўмдена. Тудо йоча ушем семын 1994 ийыште почылтын. Кажне ийын ме «олаште» у ылыше-влакым вашлийына. Школысо театрыш коштышо йоча-влак ты пашаште пеш кугу польшымын пуат. Икымше классыш толошо шольо-шўжар-шамычлан чапле пайремым эртарат. Оланан символжо – тул тўсан пырыс. Садланак театрлан тыгай лўмым

пуэнна, – палдара школ театрын вуйлатышыже Н.А.Головунина.

Шукерте огыл «РЫЖИЙ КОТ» школ театр «Школьная классика» проектыш ушнен да федерал йыжынгыште танасаш тўналеш. Ёдыр-рвезе-влак «Подвиг человеческого» темым ойырен налын. В.Распутинын ойлымашыже негызеш «Уроки французского» спектакльым ямдылат. Ты пашам нуно Б.Щукин лўмеш театр институтын экспертше-шамычлан аклаш колтат. «РЫЖИЙ КОТ» театрын участникше-влаклан ончыкыжымат чолга лияш да кугу кўкшытыш шуаш тыланена.

О.МОШКИНА-МАЙКОВА.
Фото-влакым школ театрын архивше гыч налме.

Курымеш шарнена



11 мартыште класс вуйлатышына Людмила Яковлевна Осинкина «Чтобы помнили... Чтобы поняли...» открытый класс шагатым эртарен (снимкыште). Тиде мероприятийлан ме чот ямдылалтынна. Почеламутым лудынна, мурым муренна, изи сценкым модын ончыктенна. Класс шагатышке ача-ава-влак ушненим. Павел Марков ден Настя Ярмушкина Кугу Ачамланде сарыште кредалше кугезе качашт нерген каласкаленит. Артём Семёнов пошкудыжо, Торгансола ялыште илыше, сарын ветеранже Иван Кузьмич Кузьмин нерген кугешнен ойлен. Кажныжын – шке историйже, сар корныжо. Ме нуным шарнена.

5-ше «Б» классыште
тунетше-влак.
Звенигово, Чакмарий.
Фотом школ архив гыч налме.



Ме шарнена! Ме кугешнена!

2025 ий – Шочмо элым аралышын идалыкше

Нигём ок чамане

Сар – эн шучко жап. Тудо ой-гым конда да ушеш курымешлан кодеш. Мыйын кугезе кочамат Кугу Ачамланде сарыште Шочмо элна верч кредалын. Сентымашым лишемдаш ўдырамаш ден йоча-шамычат полшенит. А сар нигём ок чамане. Икте вуйжым курымешлан пыштен, весе сусырген, кумшо увер деч посна йомын. Икшыве-влак тулыкеш кодыныт. Тиде элнан эртыме корныжо. Ме тудым сайын палышаш улына. Коча-кована-шамычын суапле пашаштым ўмыр мучко шарнаш тўналына.

Анна ПИРОГОВА.
У Торъял, Тошто Торъял.



Изи паша – кугу полыш

Икте-весе-лан полшен моштым ожнысек акленыт. Кызыт ты койыш поснак кўлешан. Школлаште тунемше-шамычат поро пашашке ушнат. Специальный сарзе операцийште улшо салтак-влаклан тўрлő сынан полышым ыштат. Теве Советский посёлкысо 3-шо номеран кыдалаш школышто тунемше-шамыч яра жапыштышт шўр наборым ямдылат (снимкыште). Ты сомылым директорын воспитаний паша шотышто алмаштышыже Н.Н.Обухова вуйлата. Нурия Николаевна аваже Таслия Икрамовна 7-ше «А» классыште тунемше юнармеец-влаклан мастер-классым эртарен.

– Йоча-влак мўнгышт гыч пакчасаскам, шылым шолтен кондат. Вара ме авамын пўртыштыжő погынена. Чыла пўчкедена да коштена. Ямде кочкышым пайлен оптена. Тыгак йоча-шамыч серышыштым да открыкыштым пыштат. Ўшанена: изи пашана кугу полышым нуа, – оила Нурия Николаевна.

Шукерте огыл тунемше-влак пастила ден емыж чипсым ыштат тунемыныт. Нине тутло кочкышат салтак-шамычым куандараш тўналыт.

Е.СЕРГЕЕВА мутланен.
Фотом школ архив гыч налме.



1-ше номеран Морко кыдалаш школышто 4-ше классыште тунемше Алексей Ягулбаев (снимкыште) «Рушник Победы» акциийыш еш дене ушнен. Тыге нуно кочаштым, сарын ветеранжым, шарнат да кугешнат.

Фотом еш архив гыч налме.

«Калык пагалыме ен лиямак!»

«Авай, тебе ужат, мый садак кумдан палыме айдеме лиям. Тый ўмырет мучко мый денем кугешнаш тўналат», – кажне гана, эргыжын ойлымыжым шарналтен, фотокартыкыжым ончен, Тамара Петровна шинчавўдышым ўштылеш. Элын талешкыжым ончен куштем манын, ава нигунам шонен огыл.

Артём Семёнов – кум падыраш кокла гыч кугурак шочшо. Изинек ен шинчаш перныше рвезе кушкын, сайын тунемын. Руш да марий литературым пагален, поче-

ламутым сылнын лудын. Ава Чапкагазше-влакым посна папкышке поген. Артём 9-ше класс деч вара И.С.Палантай лўмеш тўвыра да сымыктыш колледжыш тунемаш пурен. Кугу театрын сценыштыже модаш шонен. Шуко йолташым муын, лўмлő ен-влак дене палыме лийын. Талантше утыр ылыжын. Почеламутым возкален, семым шкеак келыштарен.

Рвезе, 18 ийым темымек, салтак радамыш касн. Армей деч вара тунемын пытараш шонен, но пўрымаш весе улмаш. Ик кечын ава

серышым налын: «Аваем, нелеш ит нал, ит вурсо, но мый контрактыш кидпалым пыштенам, специальный сарзе операцийыш каем. Тиде Шочмо эл ончылно порысем. Ўшане, садак пўртылам, калыкын пагалыме енже лиям». Но... Артёмын ўмыржő кугу сўйыштő кўрылтын. Рвезын йоча годсо шонымашыже шукталтын. Шочмо элнан геройжő лийын. Школышто геройын партшым починыт, школыш пурымаште чап онам сакеныт.

Елизавета МИРОНОВА.
Волжский, Памар.

«Юнкорын кресачаже»

Лач тыге ойленят Валентин Борисович Исенков нерген кодшо курымын 70-80-ше ийлаштыже «Ямде лий» газет дене кылым кучышо ўдыр-рвезе-влак. Тудо коло ий утла ты газет редакцийыште пашам ыштен: серыш да тўшка паша пўлкам вуйлатен. Йоча-шамычын серышыштан вашмутым возен, поро ой-кангашым пуэн.



Ила гын, Валентин Борисович 19 мартыште 90 ийым тема ыле. Тудо Одо кундем Карагўл ра-

йон Шопкер ялеш шочын. Ёмыржў мучко мари́й ўдыр-рвезе-влак коклаште талантым кычалын. Юнкор-шамыч кокла гыч шукушт писатель лийыныт да кызытат В.Б.Исенковлан тауштат.

Валентин Борисович йоча-влак-лан ятыр книга-м пўлеклен: «А гыч Я марте», «Ям-бердинын дневникше», «Мемнан Мики» да молат. Ик мыскаражым лудаш темлена.

Пушенге лийын

Мики черланен: кидыштыже, йолыштыжо, шўргыштыжў да могыржо мучко изи чўнча-влак лектеденят. Аваже тудым ик жап азапланен ончыш-ончышат, шыр-пе мучашеш мамыкым изин гына пўтырале да эм атыш чыкалтен лукто, чўнчаже-влакым тушкешт пытарыш. Шукат ыш эрте, Микин капкылыштыже тамга-влак шыри-вури волгалтыч.

Ньога кенета шыргыжале, кид-шым шаралтен колтыш.

– Авай, мый ынде изи пушенге улам.

– Кай, ала-мом ойлыштит, айдеме пушенге лиеш мо? – аваже воштылале.

– Лиеш-лиеш. Теве мыйын чыла вере изи лышташ-влак лектыныт, – ужар тамгам ончыктылеш Мики.

Чавайн



тукым улына

Кузе шонеда?

«Мо кўлеш айдемылан?» – йодын ик почеламутыштыжо поэт Валентина Изилиянова. Чынак, мо кўлеш? Кажне ег тиде йодышлан тўрлў вашмутым пуа. Ме тўрлў шонымашан улына.

Мыланем гын, авамын таза-лыкше шергакан. Лишыл родо-тукымем пиалан лийышт. Эн тўнжў – тыныс илыш. А те кузе шонеда, йоча-влак?

Александр ИВАНОВ.
Морко, Коркатово.

• Ушан ой •


Илышын азапше да куанже
Шўмыш муро кумылым пурта.
Вячеслав АБУКАЕВ-ЭМГЭК.

Шочмо йылме еш гай

«Кельмаксолаште пеш сылне ўжара. Кельмаксолаште кастен гармонь мура...», – йонгалтеш ик мурышто. Чын, тушто гармонист-влак шукин улыт, но Советский районысо Кельмаксолла школышто шочмо мари́й йылмымат келгын тунемыт да сайын палат. 11-ше классыште шинчымашым погышо Дарья Загайнова (снимкыште) поснак ойыртемалтеш.

– Кодшо ийын мари́й йылме дене олимпиадын чыла йыжыныштыже икымше лийынам, тений регион-влак кокласе этапыште кумшо верым налынам. Изииш кумылемат волен ыле. Но ачам лыпландарен моштыш. Ончыкыжым утларак тыришаш тўналам. Шочмо йылмем авам гай ныжылге да лывырге, ачам гай мотор, изам гай чапле, – ойла Даша.

Ўдыр деч йодде шым керт: «Тендан мутланымыда ойыртемалтеш. Литератур йылмым умылаш



неле огыл?» Йодышемлан тыге вавештыш:

– Кужмара, Кельмаксолла, Шуарсолла кундемшыте илыше калык «ц» дене кутыра. Тыге мутланымаш тукум гыч тукумыш куснен. Мый нимыяр ом возжыл. Литератур

йылме денат сайын мутланен моштем. Мари́й йылмым туныктышо Ирина Валериановна Караваевалан келге шинчымашым пуымыжлан тауштем. Шке диалектнам арлен кодыман. Тудо мемнан поянлыкна.

Даша «Марла чын возена» тўшка диктантышке кажне ийын ушна да сай шинчымашан улмыжым ончыкта. Сочинениймат устан сера. Поэт-фронтвик В.Я.Рожкинын 110 ияш лўмгечыжлан пўлеклалтше курсышто сочиненийым возмаште икымше верым налын.

– Мыйын шонымаште, шочмо йылмым палымам – тиде мемнан порысна. Шочмо вер деч тораште улмо годым марла мутланымым колатат, шулдыранмыла чучеш, – ойла Даша.


Х.АЛЕКСАНДРОВА.
Фотом еш архив гыч налме.




Йодышлан вашеште

- Кевытыште кӧ пашам ышта?
- Шола йолышто мыняр парня?
- Идалыкын ныл жапшым
каласе?
- Светофор мыняр тӱсан?
- Вӱд шолаш пурыжо манын,
мом ыштыман?
- Арняште мыняр кече?
- Могай вольык шӧрым пуа?
- Шошо тылзым каласе?

- Геометрический фигур-влакым шотло. Яра клеткиш возо.



- Могой цифр-влакым тындаш монденыт?




Модыш гоч
шонаш тунемына

Мо тыгай логике? Логике – тиде шонен, иктешлымышым ыштен, йырым-йырысе тўням умылен моштымыш. Йочасадыш коштшо икшыве-влакым изинек чын шонаш туныктыман. Икшывын логикыжым вияндаш манын, шонаш таратыше модыш-шамычым: шахматым, шашкым, домином, пазлым, головоломкым да молят – кучылтман. Лончылаш да шонкалаш таратыше книга-влакым лудман. Кажне ийын йочасадлаште «Умники и умницы» интеллектуал конкурс эртаралтеш. Сай шинчымашым ончыкташ манын, йоча-влаклан ямдылалтман. Икмынар заданийым темлем. Йоча-влак, уш-акылдам терген ончыза.

Лаштыкым Медведево по-
сёлкысо 6-шо но-
меран «Онтыр»
йочам виянгдыме
рүдерын кугу-
рак воспита-
тельже Ольга
Валерьевна
КАЗАНЦЕВА
ямдылен.



- **Каждне радэмышце**
іхгай арверым му.



Туштым туштена

Вашмутым муаш сӱрет-влак полшат.

- Мурен кая, шортын толеш.
- Лудын капше – вўдыштё,
почшо – серыште.
- Чыла еным пукша,
а шкеже ок коч.
- Ош чывын нерже гыч
вўд йога.




Нине мутлаште гласный буква-влак йомыныт. Чын буквам шындет гын, янлык-шамычым пален налат.

М * СК *
П * р *
Ш * НШ *
* р




• Палаш оңай •



Кумдан палыме
головаомко –
Рубикын кубикше.
Тудлан негызым
венгр архитектор
да инженер Эрно
Рубик пыштен. Тудо куд түрлө
чия дене чиялтыме 27 пу ку-
бикым ыштен. Эн кугу кубик
300 килограмман лийын.

- Стрелке полишмо дене графический диктантым возо.



1↓	1→	2↑	3←
2→	2↓	1→	1↓
3↑	1→	2↓	1←
1→	2↑	1→	1↓
5↓	2→	6↑	1←
1→	2↓	5←	4↓
2↑	1→	3↑	1←



Районышто ойыртёмалтыныт

«Эн сай школ театр-2025» районсы заочный конкурсышто 1-ше номеран Морко школышто 2-шо «Б» да 6-шо «В» класслаште тунемше-влак усталыкыштым тергенит. Изирак ийготан удыр-рвезе-шамыч (снимкыште) «Икымше ошкыл» номинацийыште «Олма мешак» йомак почеш шындыме постановкым ончыктенит. Кугурак ийготан икшыве-влак аваштымат ушенит. Нуно Кугу Ачамлан-

де сарыште Сенымашлан 80 ий теммылан пөлеклалтше «Мландымбалне Тыныслык верч» тагасыште «Ме пörтылына» постановкым аклымашке луктыныт. Кок коллектившат кокымшо верым сенген налын. Нуным мый, Анелия Георгиевна Михайлова, ямдыленам. Йоча-влаклан ончыкыжымат чолга лияш тыланем.

А.Г.МИХАЙЛОВА.

Фотом школ архив гыч налме.

Палаш онай

Пörткайык

20 мартыште пörткайыкын тунембал кечыже палемдалтын. Изи кайык идалык мучко пörт воктене чонештылеш. А те тудын нерген мом паледат?

- ✓ Пörткайыкым пакчам аралышылан шотлыман. Тудо кече мучко тужем наре шукиш-копшангым кочкеш.
- ✓ Пörткайык 20 минут наре чарныде чонештыл кертеш.
- ✓ Тудо айдемын койышыжым сайын умылен мошта. Осал да поро койышан еным вашке пален налеш.
- ✓ Узо пörткайыкын шем галстукшо уло. Галстукын кугытшым ончен, кайык ешыште озам пален налеш.

Изи озавате

Ананас салат

Удыр-рвезе-влак, айста тамле да куштылго салатым ыштена.

Кўлыт: 200 г шолтыммо чыве шыл, 200 г пенгыде сыр, 150 г консервироватлыме ананас, 100 г майонез, чывыштыш шинчал.

Шылым да ананасым кубик семын пүчкедыза. Сырым тёрко гоч нўжыза. Йörвар-влакым иктеш пыштен варыза. Майонез ден шинчалым ешарыза.



Историйым шергалына



Икымше тўнямбал сар годым руш войска-влак Австрийысе Перемышль орым йыр авырен налмаште икмыняр тылзе кученыт. 1915 ий 22 мартыште тудым сенген налыныт.

САЛАМЛЕНА!

Параньга район Матародо школышто 1-ше классыште тунемше Павел МИХЕЕВ 23 мартыште кандаш ийым тема.

Тудым аваже, коча-коваже, Алёна акаже, Ульяна шўжарже шочмо кечыж дене шокшын саламлена.

Сайын тунемаш, пентгыде капкылан куш-каш, волгыдо кумыл

дене ончыко ошкылаш тыланена. Изиракым чаманен, кугуракым пагален иле. Йырет ўшанле да сай йолташеш-влак лийышт.



0+

Марий Эл Республикасысе «Марий Эл» увер агентстве» КАУ.
Директор – Е.И.КУЗНЕЦОВ.
Тўн редактор – А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикасысе Тўвыра, печать да калык-влакын пашашт шотышто министерстве,
Марий Эл Республикасысе «Марий Эл» увер агентстве» КАУ.

Редакций да издатель: Марий Эл Республикасысе «Марий Эл» увер агентстве» КАУ,
424006, Йошкар-Ола,
СССР Вооружённый Вийын 70-ше идалыкше урем, 20-шо пörт.
Тел. 8(8362) 45-22-82.

Газетым редакцийыште погымо да верстатлыме, «Марий Эл Республикасысе Правительствын типографийже» ООО-што ямде оригинал-макет гыч савыктыме.
Типографийын адресше: 424000, Йошкар-Ола, Комсомольский урем, 112.

Печатьыш пуйымо жап – 14-00, фактически – 13-00.

Авторын да редакцийын шонымашышт тўрлў лийын кертят. Серыш-влак мўнгеш огыт колтапт. Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru
(автор-влаклан)
Сайтын адресше: ямделий.рф

У конкурс



📷 Александра ВАСИЛЬЕВА.
Йошкар-Ола, 32-шо номеран
«Калинка» йочасад.



📷 Вениамин ГОЛОСОВ.
Медведево, Новий.



📷 Полина ИВАНОВА.
Марий Турек посёлко.

Кроссворд

Руш литератур урокышто В.Г.Распутинын «Уроки французского» ойлымашыжым лудынна. Вашке кинофильмым ончена. Лудмо годым Лидия Михайловна дене кугешненна. Чынжымак, туныктышо-влакын надырышт моткоч кугу. Йоча-влак, ты ойлымаш почеш кроссвордлан вашмутым кычалза.




1. «Чика», «пристенок» модышын вес лумжө.
2. «Чика» модышын тун вуйлатышыже.
3. Тун геройлан колтымо посылкыште мо киен?
4. Туныктышын удыр фамилийже.
5. Ваня чучу могай машина дене тун геройлан ял гыч кочкыш-йуышым конден?
6. Вадикын йолташыже.
7. Туныктышын лумжө.
8. Ойлымашыште коклазын фамилийже.

6-шо классыште тунемше-влак.
Волжский, Сотнур.

Шотлыза



Янлык-влакым келшыше умылышт дене ушыза.



Пырыс кудо портышто ила, палыза.

